

Cuira, ils 28 da zercladur 2012

Communicaziun a las medias

Rumantsch grischun ed idioms en scola

Posiziun da la Lia Rumantscha en connex cun in'eventuala iniziativa dal pievel chantunala davart las linguas d'alfabetisaziun en las scolas rumantschas

I na dovra betg in'iniziativa

A chaschun d'ina orientaziun da las medias ils 28 da zercladur affirmescha la Lia Rumantscha sia posiziun areguard la dumonda da la lingua d'alfabetisaziun en las scolas rumantschas. Ella vesa la schliaziun en il model da coesistenza ch'è vegnì elavurà avant la debatta dal Cussegl grond davart la nova lescha da scola. La Lia Rumantscha vegn consequentamain a la conclusiun ch'i na dovra betg in'iniziativa dal pievel chantunala en chaussa.

In'eventuala iniziativa dal pievel chantunala che vul tranter auter fixar en la lescha da scola cleras lingias directivas davart la rolla dal rumantsch grischun (rg) en scola, periclitescha la via instradada cun il model da coesistenza. Ils dubis che intgins aderents dal rg han exprimì ch'il model impedischa quels che vulan instruir per rg èn numnadamain nungiustificgads. Il model n'impedischa en nagina moda l'introducziun dal rg en scola. Il model prevesa che las scolas che alfabetiseschan en l'idiom instrueschan rg a moda receptiva (leger e chapir) e che las scolas che alfabetiseschan en rg integreschan en l'instrucziun l'idiom a moda receptiva.

Il model da coesistenza suonda finamiras centralas

A media vista ademplescha il model da coesistenza finamiras centralas da la promoziun da la lingua. D'ina vart permetta il model a generaziuns futuras da sviluppar ina relaziun natirala cun la lingua da standard. Quai è ina finamira centrala da la promoziun da la lingua, damai che la cuminanza linguistica rumantscha vegn confruntada pli e pli cun il rg en furma scritta suenter il temp da la scola populara. In'instrucziun receptiva (leger e chapir) en rg gida a sminuir las difficultads d'access al rumantsch grischun. Da l'autra vart èn las Rumantschas ed ils Rumantschs fitg interessads da purtar vinavant lur bain cultural tradiziunal en ils idioms. Er a questa finamira correspunda il model da

coesistenza. Il model promova ultra da quai la cumpetenzza culturala interrumscha e la chapientscha surregiunala. Plinavant resguarda il model da coesistenza las pussaivladads actualas politicas, legalas e socialas.

In'iniziativa n'è betg necessaria

En general renconuscha la Lia Rumantscha l'instrument da l'iniziativa dal pievel sco med valabel legal per reglar fatschentas che pertutgan tuts. En connex cun la dumonda da la lingua d'alfabetisaziun en las scolas rumantschas ha il svilup dals ultims onns dentant mussà che la medema mesira per tuts po effectuar il cuntrari dal vuli. En quest senn è la Lia Rumantscha persvasa ch'ina iniziativa dal pievel n'è simplamain betg necessaria. Ella periclitescha seriusamain la pasch linguistica era sur ils cunfins da la Rumantschia.

Ils proxims pass

La Lia Rumantscha insista ch'il model da coesistenza vegnia resguardà en il nov plan d'instrucziun 21. Plinavant vegn la Lia Rumantscha ad iniziar ina grupp da lavur che unescha cumpetenzza politica ed enconuschientschas professiunalas per garantir ch'ils basegns futurs da las scolas rumantschas vegnian resguardads. Da quai spetga la Lia Rumantscha in success social e politic bler pli grond che cun smanatschar cun in'iniziativa dal pievel ed uschia far squitsch politic. Cun quest agir vul la Lia Rumantscha cuntanscher che la politica implementescha definitivamain il model da coesistenza che retschaiva uschia la basa legala basegnaivla. La segirezza giuridica che resulta è la basa per ina pasch linguistica persistente.

Il model da coesistenza



Grafica: model da coesistenza

Il model preveda ina coesistenza dal rumantsch grischun e dals idioms. La proposta respecta dad ina vart il dretg da las vischnancas stipulà en la constituziun chantunala da determinar lur lingua da scola en cooperaziun cun il chantun. Per il rumantsch po quai sa tractar dal rumantsch grischun u d'in idiom. Da l'autra vart preveda il model che scolars che alfabetiseschan en l'idiom dovran il rumantsch grischun a moda receptiva (leger e chapir). Las scolars che alfabetiseschan en rumantsch grischun dovran lura l'idiom a moda receptiva. Tenor il model èsi cunzunt impurtant che tut las scolars ed ils scolars s'occupian en l'avegnir pli intensivamain cun la lingua e cultura rumantscha a moda cumplessiva e sur cunfins idiomatics ora. Quai duai rinforzar la chapientscha interrumscha.

Gruppa accompagnanta politic-strategica (gruppa da lavur)

Per pudair dar dumogn a las bleras sfidas che la scola rumantscha sto aderir ils proxims onns, preveda il model da coesistenza dad installar ina gruppa accompagnanta politic-strategica. A quest gremi che fiss orientà politicamain, e betg pedagogicamain, faschessan part exponentas ed exponents dad tut las gruppas d'interess impurtantas. La gruppa duai cusseglar la Cumissiun per furmaziun e cultura e la regenza en dumondas da la strategia futura per la scola rumantscha.